

Երևանի վիճակից բոլոր վատթար մարդկանց, աղմկարարներին ու չարերին, որպէսզի ժողովուրդն ապրի առաքինութեամբ զարդարուած:

«Քեզ իրաւունք տուինք՝ քո խորհրդակիցներին համաձայնութեամբ վաճառելու հողը «մեր սեպհական ազգին» — շինութեան, բնակութեան, այգիների ու մշակութեան համար, պայմանով, որ իւրաքանչիւր գնող պարտաւորուի հատուցանել օրէնքով սահմանուած տուրքը պետութեան:

«Պատուիրում ենք քեզ, որ երկիրդ կառավարես հայոց օրէնքով»:

Այս ամէնի հետ միասին՝ իշխանի բոլոր քայլերը համապատասխան պիտի լինին օրէնքին. յետին քաղաքացին անգամ կարող է դատարանի առջեւ պատասխանատուութեան կանչել նրան՝ քմահաճոյքի եւ օրինազանցութեան համար: Իշխանն է պատասխանատու, անձնապէս, իր նահանգի բարօրութեան համար. օրինակ, դողերի ու աւազակների յափշտակած իրերի համար նա ինքը վճարում է տէրերին, մինչեւ որ դտնի գողերին ու աւազակներին ու յետ խլի նրանցից գողացուած ապրանքը (նժր): Կամ՝ եթէ պարտապան բանտարկեալը բանտից փախչում է, իշխանն է վճարում պարտատիրոջը՝ պահանջուող գումարը (նկզ):

Հեղինակը չի մոռացել մինչեւ իսկ յատուկ օրէնքով սահմանել, թէ տարեկան քանի՞ խրնջոյք պիտի տայ իշխանը, ե՞րբ եւ ի՞նչ կենացներ ու ի՞նչպէս պիտի առաջարկուեն այնտեղ (յիդ):

ԶՕՐԻՐ

Պետութեան նեցուկն ու յենարանը հանդիհասանում է զօրքը, որը առանձին խնամքի ու հոգածութեան առարկայ է Շահամիրեանի համար:

Նա փորձում է նախատեսել զօրքի ու զինուորական կեանքի մէջ կատարուող բոլոր երեւոյթները եւ համապատասխան օրէնքներ սահմանել, չմոռանալով նոյնիսկ, օրինակ, որ իւրաքանչիւր զինուոր «պարտ է ունենալ զէնս յատակ, օծեալ իւղով եւ պատրաստ (յե), որ զինուորը զգետը պիտի պահի մաքուր եւ մազերը օծեալ. (յդ), որ իր քսակում նա միշտ պատրաստ պիտի ունենայ որոշուած քանակութեամբ փամփուշտ, կայծաքար (յզ) եւն.:

Համաձայն հեղինակի օրէնքների՝ Հայաստանն ունենալու է մշտական զօրք, բայց ոչ պարտադիր զինուորական ծառայութիւն, ինչպէս այդ մինչեւ վերջին ժամանակները գոյութիւն ունէր Պարսկաստանում, որի օրինակը թերեւս ի նկատի ունի մեր հեղինակը:

Թէեւ իւրաքանչիւր այր-մարդ — ըստ Շահամիրեանի — համարում է հայրենիքի զինուոր եւ պարտաւոր է 12 տարեկան հասակից ունենալ իր սեպհական զէնքերն ու զինուորական արհեստը սովորել (նժր), բայց նա դեռ եւս զինուոր չէ — բառի բուն նշանակութեամբ — եւ զինուորական շարքերի մէջ դեռ չի մտնում պարտադրաբար:

Զինուորութիւնը, մեծազոյն մասով, կամաւոր է եւ վճարում է պետութեան կողմից սակայն մի անգամ արդէն զօրաշարքի մէջ մըտած զինուորը պարտաւոր է ծառայել մինչեւ պայմանաժամի լրանալը, այն է՝ 7 տարի (մեհ): Տասնապետից սկսած բոլոր բարձր զինուորականները կարող են ժամանակից առաջ հրաժարական տալ եւ հեռանալ ծառայութիւնից. բայց եթէ կրկին պաշտօնի մտնել ցանկանան, կ'ընդունուին իրենց նախկին աստիճանից երեք աստիճան ցած (մլք):

Միւս կողմից՝ Հայաստանի բանակը ազգային է, անպայմանօրէն հայերից միայն բաղկացած: Ոչ-հայը չի կարող վարձուել եւ հայկական զօրքերի մէջ ծառայել (նժա):

Զօրքի ընդհանուր թիւն է 90,000, որից 69,000-ը հետեւակ, 21,000-ը՝ հեծեալ: Ամբողջ զօրքը բաժանուած է 3 բանակի կամ 3 սպարապետութեան — որոնք հեղինակը «խումբ» է կոչում. իւրաքանչիւր բանակի մէջ կայ 23,000 հետեւակ եւ 7,000 հեծեալ (մեհ): Հետեւակի եւ հեծեալի սոյն յարաբերութիւնը պահպանուած է եւ ամէն մէկ մանր ու խոշոր բաժանման մէջ (յլսզ): Եթէ կամաւորներով չի լրանում զօրքի պահանջուած քանակութիւնը — 90,000 մարդ — այդ դէպքում պակասորդը լրացւում է վիճակահանութեամբ ըստ դաւառների. իւրաքանչիւր դաւառ տալիս է զինուորութեան ընդունակ իր բնակչութեան 5 տոկոսը, վիճակով (յժդ, նժա):

Երեք բանակները իրարից տարբերուած են եւ կոչւում իրենց դրօշակների գոյնով —